

**Attartornermut inatsisissatut siunnersuutissaminni attartortut suliffimmut atatillugu inissaminnik tunineqarnerminni inissiami ukiut tallimat kingulliit iluanni oqummik ajornartorsiuteqartoq paasineqarsimagaangat attartortut inissiamik allamik tunineqarnissaminnik annaasaqaratik naaggaarsinnaalernissaannik Naalakkersuisut suliaqarnissaannik peqquneqarnissaat pillugu Inatsisartut aalajangiiffigisassaattut siunnersuut.**

(Inatsisartuni ilaasortaq Sofia Geisler, Inuit Ataqatigiit)

### **Akissuteqaat**

(Ineqarnermut Attaveqaqatigiinnermullu Naalakkersuisoq)

### **Siullermeerneqarnera**

Aallarniutigalugu Naalakkersuisut sinnerlugit Inatsisartuni ilaasortaq Sofia Geisler, Inuit Ataqatigiit, aalajangiiffigisassatut siunnersuuteqarneranut qutsavigaara.

Ataatsimut isigalugu Naalakkersuisuniit ilisimatitsissutigineqassaaq, ilaqutariit Namminersorlutik Oqartussat kommunillu inissiaataanni attartortittakkani najugallit peqqissusaat pingaaruteqarmat. § 37 naapertorlugu apeqquteqaammut normu 2018-328-mut akissuteqaammi allassimasutut Naalakkersuisut suliniutinik sulianillu arlalinnik, oquk pillugu unammilligassanik akiuiniarnermik siunertaqartunik aallartitsisimapput.

Inissianik attartortitsisarneq pillugu Inatsisartut peqqussutaanni nr. 2, 12. maj 2005-imeersumi ilaatigut allassimavoq, Namminersorlutik Oqartussat kommunillu inissiaataanni illuutaanilu attartortittakkani attartukkat isumannaatsumik aserfallatsaalinnissaanut, kiisalu attartornerup aallartinnerani attartukkap pitsaasuunissaa aserfallatsaaliugaanissaalu attartortitsisup pisussaaffigigaa.

Aalajangiiffigisassatut siunnersuutip suliarineqarneranut atugassatut INI A/S aamma Iserit A/S oqaaseqaateqartinneqarput.

Suliat ingerlasarnerini inissiami attartortittakkami oqoqartoq paasineqarpat inissiaq attartortittagaq pineqartoq suliarineqartarpoq, tamatumalu kingorna siunnersortip avataaneersup inissiap attartortittakkap oqoqarunnaarnera uppersartussaavaa. Aatsaat tamatuma kingorna inissiaq attartortittagaq qinnuteqartumut attartortinneqassaaq.

Inissiap neqeroorutigineqannginnerani, inissiaq oqoqarsimappat, qaffasissumik ilisimasalimmit oqup piiarneqarnissaata qulakkeernissaa inissiaatileqatigiiffiit siunnerfigisariaqarpat. Piffissami neqeroorfiusumi inissiap pitsaassusia pingaarnertut tunngavigineqartariaqarpoq, inissiap oqaluttuarisaanera pinnani.

Tunngavissaq taanna pisortat inissiaatileqatigiiffiini attartortunut nalinginnaasunut, taamatullu attartortunut, sulisunut inissianik tunineqartunut atuuttariaqarpoq.

Oquk nalinginnaasumik silaannarmi nassaassaasarpog, aammalu piffissap qanorluunniit ilinerani inissiap iluani oqummik nassaartoqarsinnaasarpog. Oquup nalinginnaasumik nassaassaasup peqqissutsimut annertuumik ulorianaateqalerluni inerinnissaanut peqquitasut arlaqarsinnaapput, taakkunungalu inissiap attartukkap kukkusumik atorineqartarnera aammalu atortulersuutit ajoquteqartarnerat ilaapput. Taamaattumik isertilernermi inissiap attartukkap silaannarissarluartarnissaata pingaaruteqarneranik sukumiisumik paasititsisoqarnissaa pingaaruteqarpoq.

Aalangiiffigisassatut siunnersuutip inissiaatileqatigiiffiit allaffissornermut aningaasartuutaannik amerlititsisinaanera naatsorsuutigineqarpoq, aammalu tamatuma kingunerisaanik inissiat attartortittakkat oqummik ajornartorsiorfiunngikkaluarlutik piffissami sivilisuumi inoqanngittarnissaat naatsorsuutigineqarsinnaavoq.

Tamanna tunngavigalugu siunnersuut itigartinneqassasoq Naalakkersuisuniit inassutigineqarpoq.